

Ya unan hulat ni apostol Pedro

Paunan habi ha unan hulat ni apostol Pedro

Habaytsi ya una kanlan loway hulat ya hinulat ni apostol Simon Pedro, ya miha kanlan labin-loway apostol ni Panginoon Jesu-Cristo. Hinulatan nay kapareho nan Israelita ya ampaniwala kan Panginoon Jesu-Cristo, ya napitatayak ha ayri man ya logal ha lokop hên Asia Menor ta ampairapan hila gawan ha paniwala la kan Apo Jesu-Cristo. Habaytsi ya hulat ay ampataniêh hên nakêm lan ampairapan. An-ipaihip na kanla ya Mangêd ya Habi tungkol kan Apo Jesu-Cristo. Inungkat na êt ya tungkol ha kamatsan, pangabiyay oman haka ya pamag-orong hên Panginoon ya ampam-in kasiguradoan ya mabiyay hilan oman etaman. Gawan ha muwang lay habaytoy kaptêgan, ay dapat la dayin tanggapên, haka têêhêن ya hinon kaparusaan. Inaralan na hila êt no ay-êmên ya kaihipan haka pamimiyay la ay dapat mag-in ayn kapintasan nanad ha kaihipan haka pamimiyay ni Apo Jesu-Cristo. Dapat palokop hila ha kaganawan ampa-maalaa kanla. Dapat mag-in maaypa ya nakêm lan ampamaala kanlan kapareho lan ampaniwala. Dapat milulugud ya hilay ampaniwala.

Kabooan hên pinakalaman

Umpisan hulat 1:1-2

Pamanêmtêm hên tungkol ha pamiligtas ya ubat
kan Apo Namalyari 1:3-12

Ya tungkol ha pamimiyay ya ayn kapintasan
 1:13-2:10
 Dapat makatêêh ha kaparusaan 2:11-4:19
 Dapat maaypan nakêm hên humonol kan Apo
 Jesu-Cristo 5:1-11
 Ya tawlin habi 5:12-14

¹ Hiko hi Simon Pedro, ya mihay apostol ni Apo Jesu-Cristo. Anhulatan kataw, ya namibalag hên mantêg yon bali, haka napitatayak ha probinsyan Ponto, Galacia, Capadocia, Asia, haka Bitinia.

² Hêñ hato pon, ay pinili na kaw ni Tatang tamo, hi Apo Namalyari, ta muwang nay mag-in anak na kaw. Pinili na kaw ta êmén kaw mag-in mahonol kan Apo Jesu-Cristo ha kapangyarihan hêñ Espiritu na, ya hinumapat kamoyu ta pinatawad ya kasalanan yo gawan ha daya ni Apo Jesu-Cristo hêñ hiyay pinatsi.

An-ihalangin kataw ya pahanan ni Apo Namalyari ya kapatêkbékan yo haka ya ingalo na kamoyu.

Ya biyay ya ayn anggay ayan-an-êngganan tamo

³ Purién tamo hi Apo Namalyari ya Diyos, haka ya Tatang ni Panginoon tamon Jesu-Cristo. Gawan ha ingalo na, ya ayn kapantag, ay dinyanan na kitamon bayoy biyay gawan biniyay oman hi Apo Jesu-Cristo. Kabay sigurado kay ya matanggap naêñ ya mangangêd ya an-êngganan tamo

⁴ ya nakal-an ha langit. Habaytoy a angkahira, a andumawak, haka a mabaw-ahan alagá.

⁵ Matanggap yoy habayto lano no tuparêñ ni Apo Namalyari ya kaligtasan yo ha katatawlian allo, haka ya kapangyarihan na etaman ya

mangillag kamoyu, gawan ha paniwala yo kan Apo Jesu-Cristo.

6 Gawan habayto, ay malyari kaw hēn maghigla, agyan angkaranasan yo ya hinon kairapan hēn panubuk.

7 Ta ya kairapan ay pamanubuk, ta êmêñ mamwangan no pêtêg ya paniwala tamo kana. Nanad ha pamanubuk ha ginto. Ya paniwala tamo ya ayn anggaan, ay maalagá êt ha ginto ya main anggaan. No pêtêg ya paniwala tamo, ay lano ha pamag-orong ni Apo Jesu-Cristo, ay pansinêñ, dayêwêñ, haka galangêñ kitamo ni Apo Namalyari.

8 A yo man êt nahêlêk hi Panginoon Jesu-Cristo, ay anlugarêñ yo ya. A yo ya man angkahêlêk amêhêñ, ay ampaniwala kaw kana. Kabay a makwan ihipêñ ya kahiglaan yo ya ayn kapantag,

9 gawan angkatanggap yoy nay kaligtasan, ha paniwala yo kan Apo Jesu-Cristo.

10 Habaytoy kaligtasan tamo ya indin kantamo gawan ha ingalo ni Apo Namalyari, ay impamwang lan mámipamwang hēn an-ipaihip na kanla hēn hato, noa, a la taganán angkaintindihan ya habayto, pinag-aralan la man hēn mangêd.

11 Ta taganán labay lan mamwangan no makano, haka no ay-êmêñ matupad ya impapapêt kanla hēn Espiritu ni Cristo. Ta ya impapapêt kanla, ay yabay ya kairapan ya têêhêñ na, ya pangabiyay nan oman, haka ya pamag-orong na ha langit.

12 Impamwang kanla, ya alwan ha ikakangêd la, noa, ha ikakangêd tamo ya papêt la. Yabay

ya Mangêd ya Habi tungkol kan Apo Jesu-Cristo ya impalinaw kamoyu hên kalamo kon hinapatan hên Espiritu ni Apo Namalyari ya in-utoh nan ubat ha langit. Hila man ya anghel ni Apo Namalyari, ay labay la dayi hên maintindihan ya habayto.

Dapat mag-in ayn kapintasan ya biyay tamo.

¹³ Gawan ha kal-atan ya dinyag ni Apo Namalyari ha ikakangêd tamo, ay il-an tamoy ihip tamo hên manyag kalabayan na hên main pamagpigel ha sarili. Pakataniêhên tamoy nakêm tamo ha pamangênggan tamo ha ingalo na kantamo ha pamag-orong ni Jesu-Cristo.

¹⁴ Gawan hikitamoy mahonol ya anak ni Apo Namalyari, ay paan kitaminan manyag hên karawakan kalabayan lawini ya mana tamon andaygên, hên alwa kitamo êt hên anak na.

¹⁵ Noa, dapat tuwarêñ tamoy pamimiyay ya taganán ayn kapintasan, ta hi Apo Namalyari ya namili kantamo hên mag-in kana, ay banal.

¹⁶ Gawan nakahulat ha Kahulatan ya impahulat ni Apo Namalyari, ya êmêndi, “Dapat kaw mag-in banal gawan hikoy banal.”*

¹⁷ A ya ampamilin tawo hi Apo Namalyari, ya ambaêgên yon Tatang. Ampanatol ya do ha dinyag hên balang miha. Kabay dapat yo yan galangên, kaban ampamiyay kaw di ha luta.

¹⁸ Muwang tamo ya hikitamoy inlitas ha ayn pukat ya pamimiyay ya pinuli tamo ha ninuno tamo. Ya pinamayad hên habaytoy kaligtasan tamo ay alwan nanad ginto haka pilak ya angkaalihan alagá,

* **1:16** Levitico 11:44 haka 19:2.

19 ta ya pinamayad kaligtasan tamo, ay maalagáy daya ni Apo Jesu-Cristo. Hiyay nanad ha biseron tupa ya ayn kapintasan ya in-átang kan Apo Namalyari.

20 Hiyay pinili ni Apo Namalyari hén a êt dinyag ya hata luta, noa, babayo yan impamwang ha ikakangéd tamo amêhén ya maraní ya anggaan hén luta.

21 Gawan kana, ay ampagtsiwala kitamina kan Apo Namalyari, ya namabiyay kanan oman, haka namiorong kana ha langit hén mamaala hén kalamo na. Kabay nakapéptêng ya paniwala tamo kan Apo Namalyari haka an-êngganan tamoy im-pangako na.

22 Gawan nalinisan taminay nakêm tamo ha pamanhumonol tamo ha kaptégan ya tungkol kan Apo Jesu-Cristo, ay pêtêg ya pamilulugud tamon patêl ha Panginoon. Kabay ihundo tamoy pamilulugud tamo hén booy nakêm.

23 Habaytoy nanad in-anak kitamon oman, haka hata bayoy biyay ay alwan ubat ha tawo ya matsi, noa, habaytoy ubat ha habi ni Apo Namalyari ya angkabiyay ya taganán a ampangoman.

24 Gawan ya nakahulat ha Kahulatan ya im-pahulat ni Apo Namalyari, ay êmén di,

“Hilay tawo ay nanad lamon ya tampol angkayango, haka ya ikadayêw la, ay a angkabuyot, ya nanad bulaklak ya angkawngéy,

25 noa, ya habi hén Panginoon, ay taganán a am-pangoman hén angga-angga.”[†]

[†] **1:25** Isaias 40:6-8.

Yabay ya Mangêd ya Habi tungkol kan Apo Jesu-Cristo ya impamwang kamoyu.

2

Hi Panginoon Jesu-Cristo ay nanad ha pinaka-maalagáy bato

¹ Kabay alihêñ yoy na ya panyag yo hêñ hinon karawakan, hinon kalokwan, pagbabara, karidyaan, haka hinon pamaniran kapareho tamo.

² Dapat maghinta kitamo ha habi ni Apo Namalyari, hêñ nanad ha kapianak ya maghinta ha gatas, ta êmêñ humkaw ya paniwala tamo angga ha matupad ya kaligtasan tamo.

³ Daygêñ tamoy habayto gawan napaptêgan tamoy ingalo hêñ Panginoon.

⁴ Paidani kaw kan Apo Jesu-Cristo ta taganán angkabiyay ya. Hiyay nanad ha mihay bato ya in-il-an ha pamanyag bali, noa, hiyay a tinanggap hêñ tawo. Embayro man, hiyay maalagá ha hêlêk ni Apo Namalyari ya namili kana.

⁵ Hikitamo ya dinyanan biyay ni Apo Namalyari, ay nanad etaman bato ya an-il-an ha pamanyag hêñ pagsimbaan kana, gawan hikitamo ay andaygêñ nan angkapi-tsi-tsipon ya am-pagsimba kana. Pinili na kitamo hêñ mag-in pinakapari na, haka ya paghuyo haka pamagpuri tamo kana ay pinakaátang tamo kana. Habaytoy madyag tamo gawan kan Apo Jesu-Cristo ha ikahigla ni Apo Namalyari.

⁶ Muwang tamo ya pêtêg ya habayto, gawan nakahulat ha Kahulatan ya impahulat ni Apo Namalyari, ya êmêñ di:

“Lêng-ên yo! Main akon pinili, ya idistino ko ha balayan Sion. Hiyay nanad maalagáy bato ya pampah-éy hén bali, haka hilay maniwala kana ay a mahira ya nakém.”*

⁷ Kabay hikitamoy ampaniwala kana, ay an-itad tamo yan maalagá. Noa, hilay a ampaniwala kana, ay dapat lan ihipén ya impahulat ni Apo Namalyari, ya êmén di:

“Ya bato ya intapon lan manyag bali, ay yabay ya nag-in pinakamaalagáy bato, ya namapah-éy hén bali.”†

⁸ Haka na impahulat etaman ya êmén di:

“Habaytoy bato ay kapibatolán.”‡

Hén haton lagi êt, ay tinalagá nay na ni Apo Namalyari ya êmbayro ya malyari kanla, gawan ha a hila humonol ha Mangéd ya Habi tungkol kan Apo Jesu-Cristo.

⁹ Noa, hikitamoy patél ha Panginoon ya ampaniwala kan Apo Jesu-Cristo, ay pinili ni Apo Namalyari hén mag-in kana. Hikitamoy láhi na, ya ampaghuyo kana hén nanad pari ya ampipaghuyo ha pinakapoon la ha langit, ta êmén tamo ipamwang ya kapapaêpapah ya dyag na gawan in-alíh na kitamo ha kariglêman hén kasalanan, ta gintan na kitamo ha kapapaêpapah ya kahawangan hén lokop na.

¹⁰ Hén haton una, ay alwa kitamo êt kana, haka a kitamo êt nakatanggap ingalo na, noa, amêhén ay kana kitamina, haka natanggap taminay ingalo na.

* **2:6** Isaias 28:16. † **2:7** Awit 118:22. ‡ **2:8** Isaias 8.14.

*Dapat palokop ha kaganawan main tungkulan
haka panay manyag kangêran*

¹¹ Anlugurên kon patêl ha Panginoon ya napitatayak, ya ampaglaêh pon ha marayo, am-pakihabi ko kamoyu ya paan kaw manyag hêñ karawakan kalabayan lawini, ta ya pamanyag hêñ habayto ay anlumaban ha paniwala yo kan Apo Jesu-Cristo.

¹² Dapat mamiyay kitamo hêñ mangêd hêñ kalamo hilay a ampagpalokop kan Apo Namalyari, ta habiêñ la man, ya hikitamoy mapanyag hêñ nangarawak, ay mahêlêk la, ya mangangêd ya dyag tamo, haka la bayto puriêñ hi Apo Namalyari ha pamanlumatêng na hêñ manatol.

¹³ Gawan ha Panginoon, ay dapat palokop kitamo ha kaganawan main tungkulan bayri ha luta. Dapat palokop kitamo ha pinakapoon tamo.

¹⁴ Dapat palokop kitamo etaman kanlan gobernador haka ya kaatag ya an-iutoh hêñ pinakapoon hêñ mamarusa kanlan mapanyag karawakan, haka mam-in pamandayêw kanlan mapanyag kangêran.

¹⁵ Ta ya labay ni Apo Namalyari, ay gawan ha pamimiyay tamo hêñ ayn kapintasan, ay ayn hilan mahabi ya tungkol kana ya hilay ayn minúwang, ya anhumalanghang kana.

¹⁶ Hikitamoy ampaniwala ha Panginoon, ay al-way nan ipoh hêñ hinoman, haka habaytoy dapat mahêlêk ha biyay tamo. Noa, habayto ay a labay habiêñ ya malyari kitaminan manyag karawakan. Ta dapat kitamon mamiyay hêñ nanad tagahuyo ni Apo Namalyari.

17 Dapat tamon galangên ya balang hino. Dapat lugurên tamo hilay patêl tamo ha Panginoon. Dapat igalang tamo hi Apo Namalyari haka ya pinakapoon hên bansa tamo.

Têêhênyâ hadyay kairapan hêñ ayn hakit nakêm

18 Hikaw ya ipoh, ay palokop kaw ha amo yo hêñ main pamanggalang, maingaloêñ hila o alwa man.

19 Mangêd no daygêñ yoy habayto, ta ikahigla kaw ni Apo Namalyari, no gawan ha muwang yo ya, ay ampakatêêh kaw ha hadyay kairapan, agyan ayn kaw hêñ kasalanan.

20 Noa, no alimbawa ta nanyag kaw hêñ karawakan, yarin maipagmahlay yo ya pamagtêêh yo ha parusa yo! Ahê! Noa, dayêwêñ kaw ni Apo Namalyari no ampakatêêh kaw ha hadyay kairapan ya lumatêng kamoyu gawan ampanyag kaw hêñ kangêran.

21 Ta tinalagá ni Apo Namalyari, ya hikitamoy pinili na, ay magtêêh hêñ hadyay kairapan. Panêmtêman yo ya hadyay kairapan ya dinanan ni Apo Jesu-Cristo ha ikaligtas tamo, hêñ ayn hakit nakêm. Haka ha dinyag na, ay dinyanan na kitamon alimbawa ya dapat tamon honolêñ.

22 Hi Apo Jesu-Cristo ay a nanyag hêñ hinon kasalanan, haka taganán a ya naglaram.

23 Hêñ minusmus la ya, ay a ya nanumbah hêñ naghabi hêñ narawak. Hêñ pinairapan la ya, ay a ya nanumbah kanla. Pinaulayan na hila kan Apo Namalyari ya mangêd ya mangatoynungan.

24 Ha pangamatsi na ha koros, ay hiyay nagdusa gawan ha kasalanan tamo, ta êmêñ tamo

talibatokan ya kasalanan tamo haka mamiyay hēn mahonol kana. Gawan ha pangamatsi na, ay naiúmang kitamo kan Apo Namalyari ya nanad ha tinambalan kitamo.

²⁵ Hikitamoy nanad tupa ya nitama, noa, amēhēn ay nag-orong kitamina kan Apo Jesu-Cristo, ya pinakapastol, ya ampangillag kantamo.

3

Ya aral kanlan miahawa

¹ Êmbayro êt, ay hikaw ya babayi, ay kailangan yon palokop ha ahawa yo, ta no main a pon ampanhumonol ha habi ni Apo Namalyari, ay mapaniwala hila, gawan ha kangēran pamimiyay yo. Mapaniwala hila, agyan a kaw maghabi,

² ustон mahélék lay pamanggalang yo haka ya malinis ya pamimiyay yo.

³ Pakaihipén yo, ya kahampatan yo ay alwa ha pangayos lawini, nanad ha paytuyo hēn habot, o ha panggamit hēn ginto, o pagbaro hēn mangahampat.

⁴ Noa, ya dapat mag-in kahampatan yo, ya anikahigla ni Apo Namalyari, ay hatoy a ampan-goman ya atsi ha nakêm ya maaypa, haka main kapatêkbékan.

⁵ Êmén ya bayro ya pamimiyay lan babayi ya maka-Diyos hēn haton lagi, ya ampagtsiwala kan Apo Namalyari. Ya pagpalokop la ha ahawa la, ay namahampat kanla.

⁶ Habaytoy nanad kan Sara ya ahawa ni Abraham, ya hinumonol kan Abraham, ya binaêg nan ámo na, ha pamanggalang na kana. Hikaw ya

babayi amêhêñ ay manoto kaw kan Sara, no am-pamiyay kaw hêñ main kangêran, haka no alwa kaw malimo, hinoman ya malyari.

⁷ Hikaw ya lalaki etaman, ay dapat yon galangêñ haka lugurêñ ya ahawa yo ha pamilalamo yo, ta alwan makhaw ya lawini lan babayi, haka dinyanan hila etaman ni Apo Namalyari hêñ biyay ya ayn angga. Dapat yon daygêñ ya habayto, ta êmén ayn makahabkol ha panalangin yo.

Têêhêñ yoy pamagdusa ya lumatêng kamoyu agyan ampanyag kaw hêñ kangêran

⁸ Amêhêñ, ay ubuhêñ kataw hêñ aralan, ya dapat main kaw hêñ pakikimiha, mi-iingalo kaw, milulugud kaw, dapat panay mangêñ ya nakêñ yo, haka magpakaaypa kaw hêñ nakêñ ha miha ta miha.

⁹ Dapat a yon tumbahan hêñ karawakan, ya hilay ampanyag hêñ karawakan kamoyu. Haka paan kaw maghabin narawak kanlan ampaghabin narawak kamoyu. Noa, ihalangin yo hila, ya ingalwan na hila, ta pinili na kaw etaman ni Apo Namalyari hêñ mag-in kana, ta êmén na kaw ingalwan.

¹⁰ Ya nakahulat ha Kahulatan ya impahulat ni Apo Namalyari ay êmén di:

“Hilay mabay hêñ mag-in mahigla haka mangêñ ya biyay la, ay dapat patgênan lay pamaghabi hêñ nangarawak haka alwan pêtêg.

¹¹ Dapat patgênan lay pamanyag hêñ nangarawak, ta pakikwanan hila tanan manyag hêñ panay kangêran, ta êmén mangêñ ya pamakilamo la ha kapareho la.

¹² Ta ya Panginoon ay ampangillag kanlan manhonol kana, haka gilamên nay panalangin la. Noa, ampanalanghang ya kanlan mapanyag karawakan.”

¹³ Yarin main makapairap kamoyu no pakikwanan yon manyag kangêran!

¹⁴ Noa, makaranas kaw man hêñ pamagdusa gawan ha pamanhumonol yo kan Apo Namalyari, ay malyari kaw hêñ maghigla, ta ya ingalo na ay atsi kamoyu. Kabay paan kaw malimo haka paan kaw manyagah,

¹⁵ noa, dapat yon simbaêñ hi Apo Jesu-Cristo, hêñ daygêñ yo yan Panginoon ha biyay yo. Dapat panay kaw nakal-an hêñ makibat kanlan mangotâng kamoyu hêñ tungkol ha kasiguradoan yo ya iligtas na kaw ni Apo Namalyari.

¹⁶ Noa, dapat naamêñ ya pamaghabi yo kanla hêñ main pamanggalang. Dapat panay malinis ya konsinsya yo, ta êmêñ mipakarêng-êy hilay ampaghabin pamanira kamoyu gawan ha mangêñ ya pamimiyay yo, ha pamanhumonol yo kan Apo Jesu-Cristo.

¹⁷ Ta mangêñ ya makaranas kitamon pamagdusa gawan ha pamanhumonol tamo ha kalabayán ni Apo Namalyari, kanan makaranas kitamon pamagdusa ha pamanyag hêñ karawakan.

¹⁸ Ta natsi ya hi Apo Jesu-Cristo gawan ha kasalanan tamo. Minghan yan natsi, haka a yay nan matsin oman. Hiya ya ayn hinon kasalanan, ay natsi para kantamon makasalanan, ta êmêñ na kitamo maiúmang kan Apo Namalyari. Pinatsi la man ya lawini na, ay biniyay yan oman hêñ

Espiritu ni Apo Namalyari.

¹⁹ Ha kapangyarihan nan habaytoy Espiritu ni Apo Namalyari, ay nanoro ya kanlan espiritu lan natsi, ya nakahukul.

²⁰ Hila ya habaytoy a hinumonol kan Apo Namalyari hēn panaon ni apo Noe. Pinagtēêhan na hilan inêngganan ni Apo Namalyari êmēn hila dayi maghêhê ha kasalanan la, kaban ampanyag hi apo Noe hēn barko. Noa, gawan a hila naghêhê, ay wawalo hila tana, ya naligtas ha lanêm. Yabay ya hilan Noe.

²¹ Bayro kitamon makakwan alimbawa hēn kaligtasan tamo, gawan hēn binawtismoan kitamo ay inlitas kitamo ha parusa. Ta ya pamawtismo, ay alwan êmēn ha pangalih hēn yangat ha lawini tamo, noa, mihay pangako kan Apo Namalyari ya honolêن tamo ya, gawan muwang tamo ya pinatawad ya kasalanan tamo. Main kitamon kaligtasan gawan biniyay oman hi Apo Jesu-Cristo,

²² ya nag-orong ha langit, haka atsi yay na ha dapit panabtab ni Apo Namalyari. Amêhêن, hilay anghel, haka hilay kaganawan main kapangyarihan haka kaganawan main tungkulan ay ampagpalokop kana.

4

Ya bayoy biyay

¹ Gawan hadyay kairapan ya nadanasan ni Apo Jesu-Cristo hēn atsi ya di ha luta, ay dapat tamo êt hēn ilêan ya sarili tamo hēn têhêhê ya kairapan,

ta no ihundo tamoy pamanhumonol kan Apo Namalyari, angkatanam tamo man ya kairapan, ay mapaptégan ya tinalibatokan tamoy kasalanan.

² Paubat amêhêñ angga ha matsi kitamo, ay honolên taminay kalabayan ni Apo Namalyari. Alway nan sarili tamon kalabayan ya mahonol.

³ Hukad anay panaon ya hinayang tamo ha pamanyag karawakan, ya nanad ha andaygêñ lan a ampagpalokop kan Apo Namalyari, ya nanad ha pamanyag karawakan kalabayan lawini hêñ ayn pamagpigel ha sarili, pamaglahing, pamakilahing hêñ ayn têgêñ, kapaparêng-êý ya dyag ha pamagsimba ha alwan pêtêg ya diyos.

⁴ Ampag-êpapah hilay ayn paniwala kan Apo Namalyari, no awta a kaw na ampakilamo kanla ha pamanyag karawakan kalabayan lawini hêñ ayn pamagpigel ha sarili, kabay anhiraêñ la kaw.

⁵ Noa, lano tumbahan hila ta kiarap hila kan Apo Namalyari, ta nakal-an yan hatolan ya hilay angkabiyay pon, haka hilay natsi.

⁶ Kabay impamwang etaman Ya Mangêd ya Habi tungkol kan Apo Jesu-Cristo kanlan natsi, ta êmêñ hila makapaghêhê ha kasalanan la, haka mamiyay hêñ ayn angga hêñ nanad kan Apo Namalyari, natsi man ya lawini la hêñ nanad ha lawini hêñ balang miha.*

Ya kaganawan daygêñ tamo, ay dapat ha kapangyarihan ni Apo Jesu-Cristo

⁷ Marani ya anggaan hêñ luta, kabay pakataniêhêñ yoy nakêm yo, êmêñ yo mapigil

* **4:6** Roma 5:12-17.

ya sarili yo, ta êmêñ makapanalangin kaw hêñ mangêd.

⁸ Igit ha kal-atan, ay dapat milulugud kaw hêñ boon nakêm, ta no milulugud kitamo, ay panay kitamon ampamatawad.

⁹ Pakahigla kaw hêñ mamahowêñ kanlan patêl ha Panginoon.

¹⁰ Hino-hino kay na hêñ ya galing haka kamwangan ya indin ni Apo Namalyari ha balang miha. Kabay dapat tamon gamitêñ ya habayto ta êmêñ mapakinabangnan lan patêl tamo ha Panginoon.

¹¹ Hinoman kantamo ya dinyanan galing hêñ manoro, ay dapat pakaihipêñ ya habaytoy an-itoro tamo ay habi ni Apo Namalyari. Hinoman kantamo ya dinyanan nan galing hêñ maghuyo, ay dapat maghuyo ha hêkaw ya an-idin ni Apo Namalyari kantamo, ta êmêñ masimba hi Apo Namalyari gawan kan Apo Jesu-Cristo ha kaganawan dyag tamo. Purién hi Apo Namalyari ya makapangyarihan hêñ ayn angga. Amen.

Hadyay kairapan ya pamanubuk kanlan ampaniwala kan Apo Jesu-Cristo

¹² Anlugurêñ kon patêl ha Panginoon, paan kaw mag-êpapah ha hadyay kairapan hêñ pamanubuk ya angkaranasan yo, ta habayto ay taganán angkalyari ha ampaniwala kan Apo Jesu-Cristo.

¹³ Paan kaw mag-êpapah, noa, humigla kaw, ta angkaranasan yoy hadyay kairapan ya nanad ha nadanasan ni Apo Jesu-Cristo, ta êmêñ kaw humigla lano, haka man-angaw kaw gawan ha

kahiglaan yo, ha pamipamwang ya kapahilêw ya panga-Diyos na.

¹⁴ Iningalwan kaw no gawan ha paniwala yo kan Apo Jesu-Cristo ay main maghabin pamanira kamoyu, ta ya labay habiên hêñ habayto, ay atsi kamoyu ya makapangyarihan ya Espiritu ni Apo Namalyari.

¹⁵ Paan kaw mamatsin kapareho, o manakaw, o manyag kaatag pon ya karawakan, o makiêmén ha alwan dapat pakiêménan. Ta usto ya pairapan kaw no manyag kaw hêñ êmbayro.

¹⁶ Noa, paan kaw marêng-êý no makaranas kaw hêñ pamagdusa gawan ha paniwala yo kan Apo Jesu-Cristo, nokay puriên yo hi Apo Namalyari, gawan hikaw ay ambalayêñ hêñ kalamo lan ampaniwala kana.

¹⁷ Ta nilumatêñ ya panaon hêñ pamanatol ni Apo Namalyari, haka hikitamo ya atsi ha pamilya na, ay una hêñ hatolan. No hata kairapan ya angkaranasan tamo, ay umpisan pamanatol, ay kapalimo taganá ya malyari kanlan a anhumonol ha Mangangêd ya Habi ya ubat kan Apo Namalyari!

¹⁸ Êmén ya di ya nakahulat ha Kahulatan ya impahulat na:

“No kairapan ya angkaranasan lan miligtas, ya mahonol kan Apo Namalyari, ay hino baytoy malyari kanlan mapanyag kasalanan, ya alwan maka-Diyos!”

¹⁹ Kabay no ampakaranas kaw hêñ kairapan gawan ha kalabayan ni Apo Namalyari, ay ihundo yoy pamanyag yo hêñ kangêran, haka ipatsiwala

yoy sarili yo kanan nanyag kamoyu, ya a ampa-maulay kamoyu.

5

Ya aral kanlan nanad pastol ya ampamaala ha patêl ha Panginoon

¹ Amêhêñ, ay main akon iaral kamoyun toa ya ampamaala ha mipapatêl kan Panginoon Jesu-Cristo. Hikoy kapareho yon ampamaala ya nakahêlêk hên hadyay pamagdusa ya dinanas na, haka makapikiatag ako lano ha pamipamwang ya kapahilêw ya panga-Diyos na.

² Dapat yon hayhayêñ ya hilay patêl ha Panginoon bahêñ ya nanad tupa ni Apo Namalyari, ya impatsiwala na kamoyu. Daygêñ yoy habayto hên boon nakêm hên main kahiglaan, alwan ha angkapilitan kaw haka alwan gawan labay yo hên magkamain pera.

³ Paan yon daygêñ ámo ya sarili yo ha impahay-hay kamoyu, noa, dapat hikaw ya mag-in alimbawa la, ya tuwarêñ la.

⁴ Ta ha pag-orong lano ni Apo Jesu-Cristo, ya pinakapoon pastol, ya ampanayhay kantamo, ay mangêd ya mag-in primyo yo, ta makapakilamo kaw ha kapahilêw ya panga-Diyos na ya ayn anggaan.

⁵ Hikaw etaman ya miyawhay, haka hikaw ya dalaga, haka hikaw ya anak pon, ay palokop kaw kanlan toa ya ampamaala kamoyu. Hikaw ya ampaniwala kan Apo Jesu-Cristo, ay magpakaaypa kaw ngan hên maghuyo ha miha ta miha, ta êmêñ di ya nakahulat ha Kahulatan ya impahulat ni Apo Namalyari:

“Anhalanghangên ni Apo Namalyari hilay ma-paglambung, noa, an-ingalwan na hilay maaypay nakêm.”

⁶ Kabay magpakaaypa kaw, haka kaw palokop ha kapangyarihan ni Apo Namalyari, ta êmêna kaw itag-ay lano.

⁷ Ipatsiwala yo kana ya kayagahan hêni ihip yo, ta hiyyay panay hêni ampangillag kamoyu.

⁸ pigilên yoy sarili yo, haka pakaillag kaw, ta hi Satanas, ya kapatsi yo, ay nanad ha mihay leon ya ampilibot-libot hêni ampan-êngêl hêni ampanlêk hêni madawhong nan iboon.

⁹ Kabay pakataniêhêni yoy paniwala yo, ta êmêni yo ya malabanan, ta muwang yo etaman ya hilay patêl yo ha Panginoon ha boon luta, ay am-pakaranas êt hêni êmbayroy pamagdusa.

¹⁰ Alwan mabuyot ya pamakaranas yon pamagdusa. Haka pamakayarin habayto, ay daygêni kaw hêni mangêdi ni Apo Namalyari, ya main-galoêni, ya nanagyat kamoyu hêni makilamo ha ayn kapantag ya karangalan na hêni angga-angga, gawan ha pakikimiha yo kan Apo Jesu-Cristo. Pataniêhêni nay paniwala yo, haka dyanan na kaw hêni kakhawan ha pamaghuyo yo kana.

¹¹ Hiyan taganá ya ayn kapantag ha kapangyarihan ya magpa ayn angga! Amen.

Tawlin pangumusta

¹² Hinulatan kataw hêni hata naipêk ya hulat, ha hawop ni Silvano ya an-ibilang kon mapaypaniwal-an ya patêl ko ha Panginoon. Hinulatan kataw ta êmêni pahiglaêni ya nakêm yo, haka ta êmêni paptêgan ya angkaranasan yo,

ay pêtêg hên ubat ha ingalo ni Apo Namalyari. Ihundo yoy pamimiyay yo ha ingalo na.

¹³ Hilay patêl ha Panginoon ya angkapi-tsitsipon ha Babilonia, ya kapareho yon pinili ni Apo Namalyari hên mag-in kana, ay ampangumusta kamoyu. Hi Marcos, ya anlugurên kon anak ha paniwala ay ampangumusta êt kamoyu.

¹⁴ No mangapipihêlêk kaw, ay migagalang kaw ta êmén mahêlêk ya ampilulugud kaw.

An-ihalangin kataw ya main pakikimiha kan Apo Jesu-Cristo, ya magkamain kaw hên kap-atêkbêkan nakêm.

Ya habi ni apo namalyari: Bayon tsipan - Ayta Mag-antsi New Testament in Ayta, Mag-antsi

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

d2289d90-e8af-5f04-a1e1-312fd0921aff